

Mangsa banjir cecah 49,369 di Pahang, Temerloh paling ramai

Mangsa banjir cecah 49,369 di Pahang, Temerloh paling ramai

KUANTAN: Bilangan mangsa banjir di lapan daerah di Pahang terus meningkat kepada 49,369 membabitkan 12,047 keluarga sehingga jam 8 pagi tadi.

Sebanyak 339 kampung terjejas akibat banjir dan mangsa kini berlindung di 262 pusat pemindahan.

Daerah Temerloh merekodkan jumlah mangsa banjir teramai iaitu 19,875 orang daripada 4,831 keluarga di 62 pusat pemindahan.

Ini diikuti daerah Pekan dengan 9,387 orang daripada 2,245 keluarga di 40 pusat pemindahan, Jerantut (6,025 orang;1,440 keluarga)di 59 pusat pemindahan.

Daerah Maran pula mencatatkan 4,351 mangsa daripada 1,135 keluarga di 32 pusat pemindahan, Kuantan 3,880 mangsa daripada 1,030 keluarga di

17 pusat pemindahan, Bera 2,755 orang 614 keluarga di 19 pusat pemindahan.

Daerah Lipis 2,930 mangsa daripada 712 keluarga di 27 pusat pemindahan dan Rompin pula 166 mangsa 40 keluarga di enam pusat pemindahan.

Sementara itu, laluan di Kilometer 126 dan Kilometer 124 berhampiran susur keluar tol plaza Temerloh di Lebuhraya Pantai Timur (LPT) masih tidak boleh dilalui semua jenis kenderaan walaupun paras air ada menunjukkan sedikit penurunan sejak jam 7 pagi tadi.



TINJAUAN dari udara di perkampungan sepanjang Sungai Pahang di daerah Temerloh yang dilanda banjir luar biasa. Kampung-kampung yang berada di kawasan persisiran Sungai Pahang seperti Jerantut, Kuala Krau, Temerloh dan Bera mengalami banjir besar selepas Taman Negara Kuala Tahan dilanda banjir luar biasa. - Foto BERNAMA



MENTERI Besar Pahang, Datuk Seri Adnan Yaakob turun padang sama-sama membantu menurunkan bekalan makanan dan minuman di Pusat Pemindahan Banjir Sekolah Menengah Seberang Temerloh, semalam. Penghantaran barang keperluan kepada mangsa banjir melalui udara dilakukan selepas jalan darat menghubungkan Temerloh terputus akibat banjir luar biasa. - Foto BERNAMA